

## UŠUTKANA SISTEMOM U IZBORNOJ GODINI: ZBOG ODBIJANJA STRANAČKE NAREDBE, DUGOGODIŠNJA UPOSLENICA PRINUĐENA NA OSTAVKU

Posvećena uposlenica suočava se sa neetičkom dilemom u lokalnoj upravi uoči lokalnih izbora

Ženska osoba (58) bila je zaposlena u lokalnoj upravi preko 18 godina, a svoj posao je radila predano i pošteno. Međutim, miran tok njene karijere naglo se okrenuo kada je sporni predmet došao na njen sto - onaj koji je zahtijevao nezakonito postupanje u korist načelnikovog prijatelja iz političke stranke. Predmet je po naredbi načelnika trebalo raditi po hitnom postupku. U početku nije smatrala da je to mobing i zlostavljanje jer je i ranije rješavala predmete po hitnom postupku te je i tada je bilo pritiska da se mora nešto završiti odmah zbog kratkih rokova ili zahtjeva stranki.

Nestranački stav uposlenice postaje trn za načelnika čime je počelo uznemiravanje na radnom mjestu

Nije ni slutila da će je ovaj slučaj odvesti na put mobinga i zlostavljanja. S obzirom na to da nije stranački opredijeljena i da se na nju nije moglo uticati po stranačkoj liniji, to je predstavljalo problem kod načelnika i onda kada je odbila postupiti po načelnikovom zahtjevu počelo je vršenje pritiska na poslu u vidu povećanja obima posla, prekovremenog rada, smanjenja plate, hitnim naredbama načelnika za postupanjem i verbalnog maltretiranja. Ovakav mobing na poslu je trajao 6 mjeseci u kontinuitetu.

Odmazda na radnom mjestu, napuštanje od strane kolega, strah i uzaludna potjera za pravdom

U tom periodu kolege sa posla su se distancirale od nje smatrajući da ona radi protiv njih i čitave lokalne administracije. Pomoć je tražila od nadležnih institucija tj. inspekcije i upućivala je prigovore na rad načelnika tužilaštvu, ali svaki put je bivala odbijena jer nije postojao osnov za tužbu. Inspekcija nije željela da postupi po njenom zahtjevu, a čak su je i u jednom momentu obavijestili da će po okončanju postupka ona biti dužna da isplati troškove jer nije radila po pravilima državne službe. Jako joj je bilo teško nositi se sa svom tom situacijom, strahovala je za svoju porodicu i svoju djecu, mislila je da će njima neko nauditi na neki način. Trudila se suprotstaviti svojim znanjem i zakonima da dokaže da je protuzakonito to što se radi, ali uvidjela je da zakon i država ne stoji iza nje, nego iza stranke i stranačkih ljudi.

Prisilna ostavka i život u strahu dok političko favorizovanje i dalje traje

Ogromne količine stresa koje je preživjela rezultirale su blažim moždanim udarom, te se nakon svih ozbiljnih zdravstvenih problema odlučila za davanjem otkaza. Iako je njena porodica stajala uz nju, pružajući joj podršku, posljedice njenog odlaska obilježile su godine nezaposlenosti, uprkos njenoj radnoj pozadini. Prijavljivala se na različite pozicije u javnom sektoru ali nikada nije bila primljena. Smatra da se na nju još uvijek vrši pritisak indirektno i strahuje za svoj život, jer nikada ne zna kako je moguće da se „osvete“. Na njeno mjesto u službi je došao novi radnik koji je član političke stranke i koji je odmah uradio navedeni predmet ubirući privilegije i finansijske nagrade koje su u općini postale javna tajna.